

SISWATI LULWIMI LWEKUCALA LWEKWENGETA: LIPHEPHA I
SISWATI FIRST ADDITIONAL LANGUAGE: PAPER I

Sikhatsi: 2½ Emahora

Emamaki: 100

TICONDZISO

1. Leliphepha linetigaba letine nemakhasi la-13.
 2. Landzela ticondziso taleso naleso sigaba.

SIGABA A: SIVISISO
SIGABA B: SIFINYETO
SIGABA C: TINKONDLO
SIGABA D: TAKHI NETIMISO TEKUSETJENTISWA KWELULWIMI
 3. Phendvula yonkhe imibuto ngeSiswati lesemukelekile.
 4. Cala leso naleso sigaba ekhasini lelisha uphindze udvwebele ekugcineni kwaleso naleso sigaba.
 5. Shiya umugca emkhatsini wetimphendvulo takho.
 6. Caphela sipelingi (lupelomagama) nendlela lekwakhiwa ngayo imisho.
-

SIGABA A

SIVISISO

UMBUTO 1

1.1 Fundza lethekesthi bese uphendvula imibuto lelandzelako.

ITHEKSTHI A

EMACINISO

Usatfukile umndeni wasemaShonamini eMbombela lekutsiwa ushonelwe sihlobo sabo esibhedlela eThemba ngemuva kwekushaywa kabuhlungu ngemadvodza lasihlanu bamsola ngekwaba makhalekhikhini. Mandlenkhosi Dlangamandla lolinganiselwa eminyakeni lengemashumi lamabili nesihlanu ushaywe kamatima wophela ngekhatsi. Kutsiwa uhambe nebangani bakhe bayonatsa ethaveni ledvumile yakuleyo ndzawo.

Endleleni utfole makhalekhikhini wamtsatsa. Bekungusebusuku ngabo-12. Umufi bekacashe kulamanye emakamelo endzawo. Kutsiwa ngekuphatima kweliso kuchamuke emadvodza agcwele ngemuva evenini bambuta kutsi uwuntjontjeleni lomakhalekhikhini. UMnumzane Bheki Nkosi lokungulomunye umcashi uchaze kutsi lamadvodza achamuke aphetse tagila, bobhusha, emazembe naletinye tilimato. Bamshaye ngaletilimato ngalesikhatsi bamlwisa. Lamadvodza asebentise lomunye makhalekhikhini kutfole kutsi lona lomunye ukuphi. Indlela labamshaya ngayo besekalimele kamatima sekalele edamini lengati. Abazange bamnike litfuba kutsi achaze kutsi umtfole njani lomakhalekhikhini. Bekaloku abatjela kutsi umdobhe endleleni kodvwa abazange bafune kumnika indlebe. "Ngitsite ngizama kubalamula bangichilita, bachubeka nekumshaya", kuchaza uMnumzane Nkosi.

Uchubeke watsi yinindzaba bangamniki litfuba lekutsi achaze kutsi kwentekeni. Bangamniki nelitfuba lelincane lekutsi akhiphe lokusesifubeni sakhe njengoba kulilungelo lawonkhewonkhe umuntfu kuveta imiva yakhe. Batsite unyamalele kwabese kunyamalala nalomakhalekhikhini ngayiphi indlela? Watfolakala makhalekhikhini ngalesikhatsi ashayelwa babese bangena emotini bacitsa. Ngendlela bekalimele ngayo samphutfumisa emtfolamphilo lapho bafike basitjela kutsi lomuntfu ulimele matima kuncono aphutfunysiswe esibhedlela. Bahlengikati babese basibhalela incwadzi yekuya esibhedlela kulapho wafika washonela khona, kuchaza lomnumzane. UMnumzane Nkosi utsi beva buhlungu lobukhulu ngoba lomuntfu bekamsulwa. Ngabe lona wekunene bamnika litfuba kute naye akhulume loko lokwentekile mbamba ngabe nalamuhla usaphila. Lokubi nje ngikutsi kute kwaphuma umphefumulo ngentfo lengatsengwa noma kunini kantsi umphefumulo wona ngete watsengwa ungaphuma uphumile.

Lokhulumela emaphoyisa aseMpumalanga uMnumzane Siphonkabi usicinikisekile lesigameko sekubulawa kwalona wekunene. Utsite kuvele basolwa labasihlanu babingelela inkantolo yaKanyamazane. Labasolwa babalelwa eminyakeni lengu-25 kuya kulengu-35. Batawubuyela enkantolo mhlaka 06 Juni 2022 kuyolalela ngesicelo sabo sebheyili ngaLesihlanu. Loku kuyoba sifundvo kuwo wonkhe umuntfu kutsi umuntfu kufanele anikwe litfuba lekutsi naye avete lakakhe luhlangotsi.

[Incanjiwe: Siboniso Ngomane]

- 1.1.1 Bhala tingoti letimbili letingavelela bantfu labanatsa etindzaweni tekucima koma. (2)
- 1.1.2 Emaphoyisa awela ngaphasi kwaliphi litiko? Khetsa imphendvulo kuleti.
- A Litiko Letekuphepha.
B Litiko Letemphilo.
C Litiko Letebulungiswa.
D Litiko Letemfundvo. (1)
- 1.1.3 Nguliphi licala labayobukana nalo laba uma bangagwetjwa? (1)
- 1.1.4 Chaza kutsi woneni lelengaka lona baze bamshaye afe. (2)
- 1.1.5 Ngekubona kwakho kufanele yini kutsi bantfu batitsatsele umtsetfo etandleni tabo na? Chaza. (2)
- 1.1.6 Kuyintfo lenhle yini kutsi bantfu lababulele bakhishwe ngashwele? Chaza. (2)
- 1.1.7 Ngewakho emagama chaza kutsi yini ibheyili. (2)
- 1.1.8 Bantfu labanyenti batsi sigwebo sentsambo asibuye. Vuma noma uphikise lombono. (2)
- 1.1.9 Yini intfo lekufanele yenteke kute kugwemeke kubulawa kwebantfu lapha eveni? Chaza. (2)
- 1.1.10 Ngutiphi tindlela letingasetjentiswa kute lusha lungatimbandzakanyi kutidzakamiva netjwala. (2)
- 1.1.11 Nguyiphi indzima ledlalwe bucwepheshe kute kutfolakale lomakhalekhikhini lolahlekile? Chaza. (2)

[20]

1.2 Buka lesibonwa bese uphendvula imibuto lelandzelako.

ITHEKSTHI B – SIBONWA



- 1.2.1 Uma ubuka loku lokwentekako kwenteka kuphi? (1)
- 1.2.2 Loku lokwenteka lapha kulesibonwa ucabanga kutsi kubangelwa yini? Bhala kubili. (2)
- 1.2.3 Bantfu labaphila imphilo lenjena kufanele basitwe ngayiphi indlela kute baphile imphilo leyamukelekile emphakatsini? (2)
- 1.2.4 Labantfu labakulesibonwa bangena kuliphi litiko lahulumende? (2)
- 1.2.5 Uma labafundzi bangabanjwa bangabukana naliphi licala? (2)
- 1.2.6 Ngabe kufanele bakwente yini labafundzi loku labakwentako? (1)

[10]

30 emamaki

SIGABA B

SIFINYETO

UMBUTO 2

Fundza lethekesthi lelandzelako bese uyayifinyeta **ngemagama akho langengci kula-60** ubhekise kuloko lokwenta live lingene etikweletini.

TICONDZISO TEKUFINYETA

CAPHELA

1. Sifinyeto sakho asibe ngendlela **yemaphuzu lasihlanu**.
2. Veta emaphuzu lasihlanu laveta **kusetjentiswa budlabha kwetimali bese live lingena etikweletini**.
3. Caphela lulwimi lwakho lungabi nemaphutsa kute ungalahlekelwa ngemamaki elulwimi.
4. Sebentisa timphawu tekubhala nekufundza letifanele.
5. Bhala linani lemagama lowasebentisile ekugcineni kwesifinyeto sakho.

ITHEKSTHI C

TIMALI TEBAKHOKHI BENTSELA

Labanye labafana nabomkhulu Mbheduyajika babindza nje banikina tinhloko kancane. Mhlawumbe bebacabanga kutsi ayikho lentfo leshiwo nguSigidzi. Letigidzigidzi temali letjalwe ngulamave emhlaba titawushona etiswini tabo bona bodvwa labosopolitiki. Batayicucudza bona bodvwa bayishaye bayicotfule ngobe phela bona bangabamba nje imali ngaletandla tabo iyanyamalala.

Batsi bangantjontja imali bayidle bayicedze, bese benyusa umtselo batsi akube ngitsi manje lesikhokha leyo mali kube ayikadliwa ngitsi. Ayitekwa nakancane indzaba yekutsi akubuye lemali leyebiwe. Labo labayintjontjile bashushiswe kube yinkantolo yemtsetfo letsi bete licala kantsi nabatfolwa banelicala bahhodlekwe ejele.

Nyalo bakhuluma indzaba yekutsi imiholo yetisebenti tahulumende ayincishiswe ngobe hulumente akakhoni kuletsa tinsita kubantfu ngobe imali lenengi iya emiholweni yetisebenti tahulumende. Shengatsi bayakhohlwa kutsi nale mali hulumente layisebentisela kuletsa tinsita kubantfu, ngumtselo lodvonswa kulabantfu labasebentako.

Ayiphatfwa nekuphatfwa indzaba yekwehlisa umholo wabosopolitiki labahola tinkhulungwane temarandi. Ayitekwa nekutekwa indzaba yekutsi bosopolitiki ncono babophe emabhande nabo batikhokhele letinye tidzingo tabo. Bayekele kutfolo tindlu tamahhala, tekwelashwa tamahhala, emathikithi ekundiza amahhala ngobe futsi bahola imiholo lemikhulu bona. Kantsi yini vele bona bangatikhokheli baphike kukhokhelwa ngitsi ngemtselo wetfu? Abakawufundzeli nekuwufundzela lomsebenti wepolitiki kodvwa bahola imali lele etulu kwengca bantfu labaneticu temfundvo.

Kubuhlungu kakhulu kitsi tsine lesisebentako ngobe sicindzelwa ngumtsetfo kutsi sikhokhe umtselo kodvwa imali yetfu yemtselo ayibasiti labaphuyile. Lalabayisebentisa ngekuyidlabhatisa baphindze bayebe lemali yetfu yemtselo, umtsetfo bona awubacindzeli batilandze ngaloko. Nangabe umtsetfo unetindlela tekugcogca umtselo ticinele kitsi lesisebentako, kubangelwa yini-ke bese kutsi lomtsetfo naletindlela letibuka kutsi imali yetfu yemtselo isetjentiswa kahle ungasacini nakulabo labangatisebentisi ngemfanelo timali tetfu temtselo?

Imali yetfu yemtselo iyagcogcwa kodvwa ayisetjentiswa ngendlela yekuletsa intfutuko netinsita emmangweni wakitsi lophuyile. Tiphatsimandla nabosopolitiki bayatentela nje emalini yetfu yemtselo lesiyisebentele kabuhlungu, ngebucotfo nangekutikhandla lokukhulu. Abantjontji nje bayatitsatsela solo sicunsule emehlo sihlabela tingoma temzabalazo siyagidza.

[Kutawusho tikhatsi ... 229–230]

10 emamaki

SIGABA C

TINKONDLO

UMBUTO 3

INKONDLO LENGAKAFUNDVWA EKLASINI

CAPHELA: Kupoccelelekile kutsi wonkhe lohlolwako awuphendvule lombuto.

Fundza lenkondlo bese uphendvula imibuto lelandzelako.

TINYEMBETI TENTFUTFWANE

- 1 Ngelwani lolulaka lolungaka bantfu beNkhosi?
- 2 Sonani tsine bakaNtfutfwane kini?
- 3 Asisito yini tidalwa teMdali njengani?
- 4 Sesidze lesikhatsi nisibukela phasi
- 5 Ngobe sitilwanyana letihambela phasi,
- 6 Nasendlul' endleleni niyasifihlita,
- 7 Kantsi lendlela yenu nodvwa yini?
- 8 Nanijakil' anisiceli ngani kutsi sinendlulise?
- 9 Phela, natsi sisuke senta wetf' umsebenti,
- 10 Kantsi nitasihlonipha nini?
- 11 Niyasinyatsela nisishiye sisejambalala,
- 12 Niyasinyatsela sife ningayidli nenyama yetfu,
- 13 Sisale sisakake yonkh' imigwaco,
- 14 Anifuni kusibona siphila sonkhe,
- 15 Nifuna kusibona siphelile sonkhe,
- 16 Ngiyalila ngililela labangasekho bakitsi,
- 17 Sesiphila ngekwesaba elusendvweni lwakitsi,
- 18 Sesisele sibancane nisicedzile.
- 19 Ngabe kungenca yekutsi sinemitinjana?
- 20 Ngabe kungenca yekutsi sit' emandl' ekutiphindziselela?
- 21 Babe Longcwele Losekusitsekeni,
- 22 Ngab' usidalele kutsi sitawuphatfwa ngalendlela?
- 23 Kuyoze kube nini basihluphekisa?
- 24 Ngiyalubona lusendvo lwakaMazeze luphila kamnandzi,
- 25 Ngabe kungenca yekutsi luyakhona kubhaca lona?
- 26 Ngiyalubona nelwakaMiyane luphila kamnandzi,
- 27 Ngabe kungenca yekutsi luyakhona kundiza lona?
- 28 Wo, tsine sibulawa kangaka ngob' asinatimphiko.
- 29 Nkulunkulu wami sekwanele!

[Emakhono Elusha ... 28]

- 3.1 Bhala lunye luchumano lolutfolakala emgceni we-19 newe-20. (1)
- 3.2 Bunkondlo buni lobutfolakala emgceni we-9? (1)
- 3.3 Hlobo luni lwenkondlo lolu? (1)
- 3.4 Bhala ingcikitsi yalenkondlo. (1)

- 3.5 Sonkondlo ulusebentiseleni loluphawu ! kulomugca longentasi?
Nkulunkulu wami sekwanele! (2)
- 3.6 Bhala umoya lotfolakala lapha kulenkondlo. (2)
- 3.7 Ngekubona kwakho nguyiphi leNkhosi lakhuluma ngayo sonkondlo emgceni wekucala? (2)
- [10]

UMBUTO 4 TINKONDLO LETIFUNDVWE EKLASINI

EMAKHANGALA – C TSABEDZE (UMHLELI)

Lombuto unemibuto lemibili, (4.1 na 4.2) khetsa munye uphendvule ngawo.

- 4.1 Fundza lenkondlo bese uphendvula imibuto lelandzelako.

NGIYAWUTSINI? – J. J. Tfwala

- 1 Lapho imihla yami seyiphelile
- 2 Umhlaba sengi wufulatselele futsi,
- 3 Buhle nebubi bemphilo yelive
- 4 Ngingasenakukhuluma ngabo nanini-
- 5 Ngiyawutsini kuMvelinchanti?
- 6 Lapho sengim'embikwaKhe
- 7 Ngelusuku lwekuhlulelwa
- 8 Ngibutwa leluchengechunge
- 9 Ngemabanga emphilo yami-
- 10 Ngiyawutsini kuMvelinchanti?
- 11 Lapho ngibutwa ngemisebenti,
- 12 Ngiyawutsini ngalengakwentela batali?
- 13 Ngiyawutsini ngalengakwentela bangani?
- 14 Ngiyawutsini ngalengakwentela ummango?
- 15 Ngiyawutsini kuMvelinchanti?
- 16 Ngiyawukusho ngebuntsengu ngitsi:
- 17 Ngisebentile kulula kulukhuni,
- 18 Ngisebentile kukubi kukuhle,
- 19 Kute ngidle lifa laphakadze
- 20 Lapho sengiphila yangesheya kwelidliza,
- 21 Ngiyawukusho ngebuntsengu ngitsi:
- 22 Emandl'ami agucuk'esambane,
- 23 Inkhulumo yami yagucuk'umculu,
- 24 Ngafana nesimungulu nemphumphutse
- 25 Kuleli lelimagadze lahlabako.

- 4.1.1 Bhala bunkondlo lobuvelwa nguletakhi leticindzetelwe kulemigca lelandzelako:

Ngiyawutsini **ngalengakwentela** batali?
Ngiyawutsini **ngalengakwentela** bangani? (1)
- 4.1.2 Ngabe lokushiwo ngulomusho longentasi kuyahambisana nalenkondlo na? Usho ngani?

'Ngelusuku lwekwehlulela' (2)
- 4.1.3 Bunkondlo buni lobuvelwa ngulemisindvo lecindzetelwe kulemigca lelandzelako?

Ngingasenawukhuluma ngabo nanini-
Ngiyawutsini kuMvelinchanti? (1)
- 4.1.4 Ngekubona kwakho usho lani sonkondlo kutsi inkhulumo yakhe igucuke umculu? (2)
- 4.1.5 Bunkondlo buni lobakhiwa ngulamagama ladvwetjelwe kulomugca lolandzelako? Khetsa imphendvulo.

Ngisebentile kulula kulukhuni,

A Luchumanosicalo.
B Kucatsanisa.
C Imvumelwanosicalo.
D Sentakutsi. (1)
- 4.1.6 Usho kutsini sonkondlo ngalomugca lolandzelako? Chaza.

Lapho imihla yami seyiphelile. (2)
- 4.1.7 Ngekubona kwakho nguliphi lelifa laphakadze lakhuluma ngalo sonkondlo? (2)
- 4.1.8 Ngabe lenkondlo iluhlobo luni? Usho ngani? (2)
- 4.1.9 Bunkondlo buni lobuvelwa ngulemigca lelandzelako?

Ngafana nesimungulu nemphumphutse
Kuleli lelimagadze lahlabako. (1)
- 4.1.10 Bhala umugca lowakha imphindvwa lotfolakala kulenkondlo. (2)
- 4.1.11 Ngekubona kwakho ngubani Mvelinchanti? (2)
- 4.1.12 Bhala ngesifundvo sinye lositfolo kulenkondlo. (2)

[20]

NOBE

4.2 Fundza lenkondlo bese uphendvula imibuto lelandzelako.

APH'EMAGUGU – M. S. MAGAGULA

- 1 Ngiyakhala nangicabang'emagugu
- 2 Emagugu phas'etibilini temhlaba
- 3 Temhlaba welive laMswati.
- 4 Iph'igolide nesiliva kaNgwane?
- 5 Sekwasal' imigedze lengemakhay' etimamba,
- 6 Kwasala tindvundvum' emanyela engcebo,
- 7 Labayigubha baphangelana baphangi,
- 8 Yetfwalwa tinkayiman'idzabula tilwandle,

- 9 Sekwasal' imphaka yemigodzi yemalahle,
- 10 Lolumnyama lutfuli lubhunya luy'etulu,
- 11 Lumbony' eMaswati atfungats' umnotfo,
- 12 Insimbi bayimb' eNgwenya bayivukuta,
- 13 Kwatsiw' akayigobi Ngwan' igotjw' eJalimane,
- 14 ENgwenya yasal' imigodz' ikhamisile.
- 15 EBulembu bulembu batsandzel' imigodzi,
- 16 Litjeboya balivukute balicedza,
- 17 Lihlehletela ngeluthaka liy' eBhabtini.

- 18 Kuyoba kuhle kuwe Ngwane,
- 19 Sitivukuta tibilini temhlaba,
- 20 Siwakhiph' emagugu siwasakata,
- 21 Lapho bakusasa sebasibut' emagugu,
- 22 Sibanik' imphendvulo yetibiyo telive,
- 23 Timile titinsika teMaswati,
- 24 Tingemagugu laphum'etibilini
- 25 Temhlaba siwuvukuta sifun' ingcebo.

4.2.1 Bhala bunkondlo lobakhiwa nguletinhlamvu leticindzetelwe.

Litjeboya balivukute balicedza,
Lihlehletela ngeluthaka liy' eBhabtini. (1)

4.2.2 Lolutfuli lakhuluma ngalo sonkondlo emgceni we-10, kungani lubemnyama? (2)

4.2.3 Ngekubona kwakho ikhuluma ngani lenkondlo? (2)

4.2.4 Kubangelwa yini kutsiwe Ngwane angayigobi lensimbi lekukhulunywa ngayo lapha kulenkondlo? (2)

4.2.5 Bhala ingcikitsi yalenkondlo. (2)

4.2.6 Bhala ngephethini yalenkondlo ngekubuka emagama, imigca kanye netindzima. (3)

4.2.7 Bunkondlo buni lobakhiwa nguletinhlamvu leticindzetelwe
tabamnyama kulomugca lolandzelako?

Timile titinsika teMaswati, (1)

4.2.8 Bhala tintfo letimbili letihlomulwa ngummango kuloko sonkondlo
lakhuluma ngako. (2)

4.2.9 Bunkondlo buni lobakhiwa ngumugca-14 kulenkondlo? (1)

4.2.10 Bantfu bendzawo ngusiphi sifundvo labasitfolako uma bafundza
lenkondlo? (2)

4.2.11 Ngemigca lemibili bhala umcondvo losebaleni walenkondlo. (2)
[20]

30 emamaki

SIGABA D TAKHI NETIMISO TEKUSETJENTISWA KWELULWIMI

UMBUTO 5

5.1 Fundza lethekesthi bese uphendvula imibuto lelandzelako:

ITHEKSTHI D

LUDLAME EBANTFWANENI

Lokutfolwe Isolezwe ngeMgcibelo, lena yindzaba leyentiwe ngumkhulu loligama lakhe ligodliwe. Umphakatsi usale umangele, ukhatsatekile ngulomhlolo lowentiwe ngumkhulu walomntfwana. Isolezwe ngeMgcibelo lishaye le lusingo lomunye lomsikati lokusoleka kutsi wakhe lomntfwana wavele wakhala wabese uvala lusingo angasaphendvuli lutfo. Hawu! betindzaba batsi lomake walomntfwana sewutfutsile eNtunjambili, kodvwa ukhona lapha KwaZulu-Natali kulenye indzawo lapho atifihle khona.

Losondzelene nemndeni locele kutsi ligama lakhe lingavetwa, utsite nalamuhla basatibuta kutsi lomkhulu usitsatsaphi sibindzi lesingaka. Kutfolakale kutsi lomkhulu utsandza gologo. Lokutfukutselise lomkhulu utsi lomtukulu wakhe umitsa kakhulu kantsi futsi ngubani lotawondla lomntfwana. Likhansela lendzawo uMnumzane Nkosinathi Sibiya, umangele lunya lelentiwe ngulomkhulu watsi luhlatimulisa umtimba. Sibiya utsite batjelwe kutsi kunesidvumbu semntfwana lesitfolakele singcwatjwe emadlelweni etinkhomo.

"Ngikhuluma nawe nyalo nawu umgodzi lapha phambi kwetfu lebekungcwatjwe khona lomntfwana. Sonkhe sisamangele futsi kulenzawo asikate siyibone intfo lenje," kusho Sibiya.

[Nkosikhona Cele]

5.1.1 Shano kutsi titfo tini tenkhulumo leti leticindzetelwe kulemisho lelandzelako:

- (a) Ngulomkhulu leli ligama **lakhe** ligodliwe. (1)
- (b) **Umphakatsi** usale umangele ngulomhlolo lowentiwe ngumkhulu walomntfwana. (1)
- (c) Lokutfutselise lomkhulu utsi umitsa kakhulu kantsi futsi ngubani **lotawondla** lomntfwana. (1)

5.1.2 Shano tindlela tesento letikulemisho lelandzelako.

- (a) Wakhala wabese uvala lusingo angasaphendvuli lutfo. (1)
- (b) Lokutfutselise lomkhulu ngikutsi lomtukulu wakhe utsandza kumitsa kakhulu kantsi futsi ngubani lotawondla lomntfwana. (1)
- (c) Lomkhulu utsi lomtukulu wakhe uyamitsa kakhulu. (1)

- 5.1.3 Cala lomusho lolandzelako ngekutsi "**lomnyaka lophelile**":
Kutfolakale kutsi lomkhulu utsandza gologo. (2)
- 5.1.4 Nika mcondvophika waleligama lelicindzetelwe kulomusho lolandzelako:
"Ngikhuluma nawe nyalo nawu umgodzi lapho **phambi** kwetfu." (2)
- 5.1.5 Sebentisa ligama "**Sibindzi**" emshweni ivete inshokutsi leyehlukile kulena lekuletheksthi. (2)
- 5.1.6 Cala lomusho lolandzelako ngekutsi "Labasondzelenene nemndeni ...":
Ucele kutsi ligama lakhe lingavetwa. (2)
- 5.1.7 Lungisa liphutsa kulomusho lolandzelako:
Lokutfukutselise lomkhulu kutsi lomzukulu wakhe umitsa kakhulu kantsi futsi ngubani lotawondla lomntfwana. (2)
- 5.1.8 Bhala lomusho ngesikhatsi lesitako. Buka emagama lacindzetelwe.
Umphakatsi **usale** umangele, ukhatsatekile ngulomhlolo **lowentiwe** ngumkhulu walomntfwana. (2)
- 5.1.9 Tsatsa luvelomagama lolutfolakala kuletheksthi wakhe ngalo umusho lowehlukile kulona lokuletheksthi. (2)
- 5.2 5.2.1 Phindza ubhale lomusho lolandzelako, kodvwa endzaweni yeligama lelicindzetelwe, ufake libitomfutiselo:
Bafundzi banatsa **tinatfo** letinhlobonhlobo. (2)
- 5.2.2 Akha imisho lecuketse letitfo tenkhulumo letilandzelako:
(a) Sibaluli. (2)
(b) Sabito lesibandlululako. (2)
- 5.2.3 Akha imisho lecuketse loluhlobo lolulandzelako lwetinkhulumo:
(a) Letsatsa luhlangotsi. (2)
(b) Lehhungako. (2)

30 emamaki

Samba: 100 emamaki